

國子監志

告祭

卷之二十八  
禮志四  
釋菜  
卷之二十九  
禮志五  
釋褐  
卷之三十  
禮志六

第四冊

國子監志卷二十八

禮志四

釋菜

順治元年。定月朔行釋菜禮。設酒芹棗栗。祭酒於

先師位及四配位前三獻。東西哲廡位前。以監丞博士等官分獻。次詣

啓聖祠。今改祠崇聖祠行禮。分獻官亦隨行禮。十五日。司

業。上香。與朔日同。



謹案舊制。每月朔望。堂上官率屬赴後殿及土地祠行禮。今惟正月行之。餘俱派監丞博士助教等員於

崇聖祠行禮。助教一員。於土地祠行禮。又東西哲向以監丞博士分獻。今博士助教等官輪派。監丞不與焉。

○釋菜儀注

是日清晨。主獻祭酒及隨班行禮之祭酒司業俱詣致齋所。更朝服。贊引導由東角門入。監丞

博士。八旗官學助教。六堂助教學正學錄等官。八旗官學教習。暨肄業貢監生。皆從詣階下。通贊贊排班。班齊。贊跪叩興。行三跪九叩禮畢。贊引導詣盥洗所。盥手悅手。再詣酒罇所。司罇者舉罇酌酒。執爵者由中道上。贊引導祭酒由東階升。從殿左門入。贊引贊詣

至聖先師神位前。一跪一叩興。獻三爵。一跪三叩興。

階下俱隨班行禮。

贊引贊詣復聖顏子宗聖曾子述聖子思子亞聖孟子位前。各行三獻禮。如正位儀。

十二哲兩廡分獻官。俱蒞祭酒詣亞聖位前時。各贊引引詣神位前行禮。如四配儀畢。贊引導各官由殿右門出。下西階復位。通贊贊跪叩興。祭酒及各官行三跪九叩禮。興贊禮畢。導由西角門出。

崇聖祠主獻分獻。與前殿儀同。翌日。上香。司業詣致齋所更朝服。儀如月朔。不獻爵。

謹案元日各官

朝賀。次日釋菜。餘月朔望。如遇

壇

廟大祀。堂上官均與陪祀。則派監丞等率八旗教習六堂諸生。在階下行三跪九叩禮。不獻爵。不上香。

○釋菜執事員數

朔望行禮。

大成殿

崇聖祠糾儀官二員。博士助教等官充之。

朔日釋菜。

大成殿侍班二名。通贊四名。正引哲引廡引各四

名。正位司罇一名。東西哲司罇二名。東西廡司罇二名。正位司爵三名。四配司爵八名。東西哲司爵六名。兩廡司爵四名。

宗聖祠侍班二名。通贊正引配引廡引各二名。正位司罇一名。東西廡司罇各一名。正位司爵五名。配位司爵二名。東西廡司爵各一名。望日。上香無司爵。改司罇為司香。

謹案康熙二十四年。議准每月朔望。

文廟行釋菜禮。於各項監生內。選取容止端莊聲音

明亮者十名。充禮生。裸獻贊禮。二十九年停止。以教習帶管。今用本監內班肄業生。

○釋菜事宜

朔日釋菜。應用香燭酒果。望日。上香。應用香燭等項。均前期行文太常寺。給發關領。至期陳設。屆期清晨。由神庫點取應用獻爵等器。敬謹洗滌備用。朔望日。均於

大成殿階墀下甬道中。鋪設梭毯。分三班。前祭酒司業。次分獻官。次隨班行禮官。其八旗教習。及

六堂肄業生。分東西二班。有琉球官生時。亦隨該學教習。附於肄業生之次行禮。

崇聖祠亦鋪設階墀之下。不分班。以上典簿承辦其執事

各生。由六堂先期揀選開送。照例分派立執事

名冊一本。拜

廟名冊一本。令諸生各赴持敬門。畫到。不到者查

明記過。以上監丞承辦

謹案現行朔望禮儀。前後殿分獻侍班糾儀等員。均於博士助教。學正。學錄。典簿。典籍。內輪充。

監丞有稽查執事諸生之責。止隨班行禮。

附

元

中統二年詔

宣聖廟月朔釋奠。元史世祖紀

謹案月朔釋奠。即釋菜也。攷今國子監

先師廟。成於成宗大德十年。則此事應在南城國子

學。有元詳於釋奠。而釋菜無聞。故錄此以備一

代之制。又案元史選舉志。侍儀舍人。於上中齋

舉禮儀習熟。曾掌春秋釋奠。每月告朔明贊。衆  
與其能者充之。蓋今所為月朔釋菜者。元時又  
謂之告朔也。

明

成化二十二年。二月朔。當釋菜。值上丁。令以次

日釋菜。明會典

嘉靖九年。釐正祀典。罷內臣降香。同上

謹案明初。每月朔望。遣內臣於

先師廟降香。至是始罷。

萬曆二十三年。定每月朔行釋菜禮。明史禮志

又公侯駙馬伯及戚畹子弟初入監之日。謁

先師廟。行釋菜禮。用兔醢果酒香燭。陳設如常儀。各

爵列班於廟墀。禮生贊行四拜禮。班首上殿獻

爵如常儀。復位。又行四拜禮。監生初入監。赴

先師廟報名。廟中禮生贊謁。

先師行四拜。明太學志

謹案以上二條。別於朔日釋菜。即古始入學釋  
菜之意也。附識以備參考。

○明朔日釋菜儀

每月朔祭酒率分獻官暨各屬官監生行禮分獻官以監丞博士助教學正學錄為之前期一日遣屬官一員率廟戶赴太常寺關領祭品其日清晨執事者各司其事分獻官各官分列于櫺星門內監生排班于廟門內俟獻官至通贊唱排班獻官以下各就位通贊唱班齊關戶鞠躬拜興拜興平身引贊詣獻官前唱詣盥洗所獻官盥手悅手訖引贊唱詣酒罇所司罇者舉

纂酌酒訖引贊唱詣

至聖先師孔子前跪獻爵俯伏興平身

執事者並同引贊

唱詣復聖顏子宗聖曾子述聖子思子亞聖孟子前儀竝同十哲兩廡分獻官一同行禮畢引贊同唱復位導獻官分獻官至原拜位立通贊唱鞠躬拜興拜興平身闔戶禮畢

同上

○明聖日行香儀

是日清晨監丞暨闔屬官分列于櫺星門內監生排班于廟門內候祭酒司業至通贊唱排班



班齊闢戶。唱鞠躬拜興拜興拜興平身。闔戶。唱禮畢。退。上同。

國子監志卷二十九

禮志五

釋褐

順治二年。定每科新進士臚唱後。擇吉日。狀元率諸進士詣廟釋褐。先行釋菜禮。

先師孔子及四配。以一甲第一名主獻。東西哲位。以一甲第二名。第三名分獻。東西廡。以二甲第一名。三甲第一名。各分獻。諸進士俱隨班行禮。禮畢。釋褐。更補服。詣彝倫堂。簪花飲酒如儀。

謹案一甲三名已經授職各服頂帶掛朝珠二甲進士均常服素金頂行禮又案乾隆十年定繙譯進士照文進士例謁

先師廟行釋褐禮

○釋褐儀注

是日清晨狀元率諸進士至集賢門外下馬入持敬門詣致齋所贊引導由東角門入詣殿階下通贊贊排班班齊贊就位行謁見禮贊跪叩興三跪九叩畢通贊贊行釋菜禮禮畢由西角

門出詣致齋所神庫前釋褐候祭酒司業朝服升堂諸進士由太學左門入至階下序立曾入監者升露臺四拜起立臺西未入監者露臺下兩拜祭酒司業俱坐受禮畢一甲三名由堂東門入執事者設食案於座前祭酒司業下座面南立一甲三名面北立執事者簪花斟酒一甲三名向上揖飲酒三爵出祭酒司業送至堂門內諸進士由堂西門入本監屬官接待簪花飲酒如儀畢送出堂簷下

○釋褐事宜

新進士釋褐。先准禮部知會日期到監。本監典簿具稿行文戶部。移取花紅香燭酒果銀十五兩。照例備辦。屆期陳設。與朔日同。

附

元

中選進士。賜恩榮宴于翰林國史院。擇日詣

先聖廟行舍菜禮。第一人具祝文行事。

元史選舉志

明

萬曆二十三年。定每科進士行釋菜禮。先日太

常寺備祭品。兔醯棗栗蔬酒香燭于殿廡

神位前。是日清晨。狀元率諸進士行四拜禮。其中服

每襲巾一如唐制。袍一。用玉色羅為之。木笏一

靴一。布襪一。俱貯藏用所。放榜前三日。各赴監

關領。釋菜畢。乃解巾袍服。官服謂之釋褐。巾袍

等送至監驗收。明史禮志

崇禎十三年。命將下第舉人與廷試進士史惇等一百六十三人。盡留特用。於是惇等上疏請

援進士例謁

文廟。行釋菜禮。閣臣張四知以為不可。上命如所請。

日下  
舊聞

國子監志卷三十

禮志六

告祭

康熙五十一年。

詔升配朱子于

大成殿為十一哲。

遣官至國子監告祭

先師孔子及朱子位前。

謹案朱子神位。既改稱先賢。升配殿上。其舊供

先儒神牌。移奉

御書樓中。

雍正元年。

詔封

孔子先世五代為王。

遣大臣至國子監告祭。

世宗憲皇帝御製追封

孔子五代告祭

聖廟文

道尊往聖。宜錫類以推恩。牒溯前徽。乃緣情而制禮。

絲綸聿賁。俎豆維新。仰維

先師孔子。撰合乾坤。名高日月。纂修刪定。煥六籍之

文明。祖述憲章。樹百王之儀範。朕夙承

庭訓。嚮往實深。誕紹丕基。欽崇彌切。惟德全而業盛。知

積厚而流光。爰命廷臣。式稽譜系。詒謀式穀。洵篤慶

於一門。毓秀鍾靈。宜上追於五代。竝躋祀典。特晉王

封體

皇考敬師之心。宏

先聖顯親之孝。於戲。金聲玉振。集古今之大成。木本水源。享丞嘗之美報。靈其不昧。尚克來歆。

乾隆二年。

詔國子監

文廟易用黃瓦。

遣官告祭

先師孔子。

三年。

詔升配有子于

大成殿為十二哲。

遣大學士至國子監告祭

先師孔子及有子位前。

三十二年。

詔大修國子監

先師廟。

遣大學士告祭。

三十四年。

先師廟工成安奉

神位。

遣大學士告祭。

告祭儀注

是日五鼓。承祭官豫。蒞于持敬門內齋所。贊引太常寺贊禮二人。蒞于門內。均朝服。質明。引承祭官自

大成門左側門入。盥手。就位。上香。讀祝。行三獻禮。升降進退。均與春秋丁祭

遣官禮同。

告祭事宜

遣官暨執事官。均致齋一日。豫期。太常寺設案一于大成殿內正中。少西北嚮。翰林院具祝文。太常寺卿送內閣恭書。受而供諸

殿內案上。行禮如儀。屆期

先師位前。陳鹿脯。鹿醢。兔醢。榛栗。葡萄。桃實。蓮實。鑪。鐙具。設案于東。陳禮神制帛一。色香盤一。尊一。

爵三。太常寺司祝一人。立于案西東面。司香司帛司爵各一人。立于案東西面。設洗于階下之東。

謹案告祭之禮。即古始立學之祭也。漢世雖立學。而斯禮無聞。三國魏正始中。以講經通使太常釋奠。

孔子。是為遣官祭告辟雍之始。其後北魏有告謚之典。開元有冊贈之文。竝令公卿持節奠祭。見于史傳。自宋及元。衰封崇祀。典禮不絕。而告祭無

明文。明洪武十五年。太學易塑像為木主。遣禮臣以太牢祭。成化十三年。增籩豆十二。舞八佾。遣商輅告祭。隆慶五年。以薛瑄從祀。遣祭酒馬自强告祭。亦雜見于紀載。而正史不書。國朝著為令典。儀制加詳。凡追崇升祔。釐正典禮。及建修落成。竝

遣官告祭。儀與春秋釋奠同。所以妥神明者至矣。惟雍正二年七年。

世宗憲皇帝親詣告祭。恭載本志



親詣釋奠。謹識。



